

licet non de legitimo thoro natus, filius videlicet fratris Leonis X, a. D. 1524 in mense Octobri ecclesiam gubernandam suscepit. Hic dispensacionem dedit abbatibus et monachis ordinis S. Benedicti per provinciam Moguntinam, quod vesci possunt carnibus tribus diebus in hebdomada, eciam in refectorio, anno pontificatus sui primo.

---

A. D. 1273. Rudolphus imperavit.

Rudolphus comes de Habsburck a Gregorio X. in concilio Lugdunensi pro futuro imperatore est confirmatus. Hic erat devotus et pacificus, contra malos strenuus. Eo tempore Otakar rex Bohemie Austriam, Stiriam etc. occupavit, quas in manus regis Rudolphi resignavit. Bohemiam et Moraviam de manu regis per sceptrum et gladium in feudum suscepit. Post tamen hoc per inductionem uxoris sue revocavit, quapropter ipse cum suis circa Marcham in bello per Rudolphum occiditur. Hic Rudolphus dedit filio suo Alberto Austriam. Postea idem factus est rex Romanorum.

A. D. 1292. Adolphus imperavit a. 6.

Adolphus comes de Nassawwe per electores uniformiter eligitur et Aquisgrani coronatur. Et electio ejus a papa approbata. Tamen Albertus dux Austrie, filius Rudolphi, postea ex inductione domini Maguntini cepit regnum Romanorum aspirare et in bello Adolphum occidit.

A. D. 1299. Albertus dux Austrie imperavit a. 9.

Albertus dux Austrie, filius Rudolphi de Habsburck, monoculus, distortus et avarus, sed audax et fortis, quem papa confirmare noluit, scribendo: 'Occidisti et insuper possedisti'. Hic multos habuit filios, quos in principatibus suis investivit, et adversarios sibi faciens favorabiles. Hic prodiciose occisus est a Johanne duce Swevie, fratris sui filio.

A. D. 1308. Hainricus VII. imperavit a. . . .

Hainricus VII. comes de Luczeburckg, filium suum Johannem ad regnum Bohemie promovit et relictam virginem filiam prioris regis tradidit in uxorem. Hic post sacramenti suscepcionem per poculum calicis est intoxicatus: noluit ad consilium medicorum venenum versis pedibus expellere, dicens gloriosius velle mori et sic Domino spiritum commendavit. Post Fridericus dux Austrie quorundam electorum habens vocem aspirat ad regnum, (contra) quem Ludwicus dux Bavarie bello prevaluit Fridericumque captivavit, (qui) eidem Ludwico cessit.

A. D. 1328. Lodowicus imperavit a. . . .

Lodowicus Rome per senatorem Romanum seu Urbis prefectum est coronatus, et intrusit quendam fratrem Minorum, Petrum de Corbario, pro papa, qui vocatus est Nicolaus V. Qui Lodowicus cum intrusit (sic) fuit per Johannem papam